

Regional News Unit AIR Aizawl
Tuesday, January 06, 2026
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

- Khawchin thlirlawktu India Meteorological Department (IMD) chuan tunkar lo awm turah khua a vawt zual tura ngaih a ni an ti a, mipuite fimkhur turin an chah.
- Natna darh lohna tura Lawngtlai Dist leh Myanmar inrina khar mek chu ni 11 atanga hawn theih a nih a beisei thu Lawngtlai Bawrhsap in a sawi.
- Union Agriculture and Farmers' Welfare, and Rural Development Minister Shivraj Singh Chouhan chuan Viksit Bharat-G Ram G Act chu thingtlang khuate intodelhna tura kawng pawimawh tak a ni a ti.
- Union Home Affairs and Cooperation Minister Amit Shah-a chuan wawiinah CSR Conclave New Delhi-ah a hawng dawn.

<><><>

IMD

Khawchin thlirlawktu India Meteorological Department (IMD) chuan tunkar lo awm turah khua a vawt zual tura ngaih a ni an ti a, mipuite fimkhur turin an chah.

Akashvani zawhna chhangin Aizawl Meteorological Centre Director Pu Sudheer Kumar Dwivedi chuan mipuite chu fimkhur tura chahin ina awm tam tur leh pawn chhuak tam lo turin a chah a, kumin thlasik chu kum dang aiin a vawt a tunkar chhung hian khaw vawt zual thei anih avangin mipuite fimkhur turin a chah a ni.

Hetihlai hian tun dinhmunah chuan boruak a la hniam em em hran lova, nimin khan a lum lai berin celsius degree 19 leh a vawh lai berin celsius degree 8 a ni a, Mizoram District hrang hrang te khaw vawt hian a tuam tura rin a ni a, Lawngtlai leh hmun thenkhatah temperature hi hmun dang aia a vawh rin a ni.

Indian Meteorological Department Director Sudheer Kumar Dwivedi chuan Mizoramah thlasik laiin a vawh lai berin celsius degree 8 aia hniam a la tawng lo tih sawiin kumin-ah erawh hei aia vawt hi a tawn theih rin a ni a ti bawk.

<><><>

EF&CC DEPT

Environment Forest and Climate Change Department chhinchhiah danin Mizoram chhungah ramngaw square kilometer 9,891.29 humhalh mek a ni.

EF&CC Department chhinchhiah danin ramngaw humhalh hi hlawm li a then hran a ni a, heng zingah hian reserved forest chu zau berin square kilometer 4498.54 a awm a, protected forest square kilometer 1997.75 niin, Unclassed Forest square kilometer 833 bakah District Council pathumte huam chhunga ram ngaw humhalh square kilometer 2562 a zau a awm bawk.

Environment Forest and Climate Change Department chhinchhah danin lui kama ramhnuai awm humhalh chu a belhkhawmin square kilometer 1832.5 a zau a ni a, Innerline Reserve Forest chu a belhkhawm a square kilometer 570 a zau a nih bakah Roadside Reserve Forest pawh a belhkhawmin kilometer 97.2 a zau ni a chhinchhiah a ni bawk.

Voice Cast

Mizoram a District Council pathumte huamchhungah Chakma Autonomous District Council huam chhunga ramngaw humhalh chu zau berin CADC area-a ramngaw zau zawng belhkhawm hi square kilometer 1369 a zau ang a chhinchhiah a ni a, Lai Autonomous District Council huamchhungah ramngaw humhalh zau zawng square kilometer 976 awm ang a chhinchhiah ni bawkin, Mara Autonomous District Council huamchhungah ramngaw humhalh square kilometer 217 awm ang a chhinchhiah a ni bawk.

<><><>

LAWNGTLAI DC

Lawngtlai Bawrhsap Pu Donny Lalruatsanga chuan a Office Chamber-ah Chanchinbu mite kawmin, kum tharah Lawngtlai khawpui hmasawna tur kawng hrang hrang duan mek a ni, a ti a. A bik takin Traffic chungchangah hmalakna lian tham tak neih tum niin, Foreigner chungchangah inkhuahkhirhna felfai zawk siam a, State sawrkarah theihluh a nih tur thu a sawi.

Faina kawnga Lawngtlai khawpui chhung veng hrang hrang inelna 'Bawrhsap Aawrd' chu kumin Republic Day - ah sem a nih tur thu a tarlang a. Project lian zawk siam a hmalakna turah - Cheural Tlâng - Khaw za lang tlang, Paithar Tlâng, Ditlang hming put chhan Dîl te hmachhawpah dah a nih thu a sawi a. Ramri khar mek chungchangah natna a darh lohna tur a nih thu sawiin, inkaihhruihana felfai tak siamin, ni 1 latanga hawn theih a nih a beisei thu a tarlang bawk.

He hunah hian Sr. Superintendent of Police Pu PC Lalchunlura chuan hunpui laiah Dan leh thupek kenkawh kawangah harsatna lian tham a awm loh thu a tarlang a. NGO - te nen a thawhhona tha tak a awm tih tarlangin, hunpui laiah case- 4, chiah ziah luh a ni, a ti. Kum 2025 chhungin case- 65, ziah luh a nih thu tarlangin, kum 2024 aiin case hi a tlahniam a ni, a ti a. Operation Jericho- kalpui vang te, NGO leh MJA te nen a thawhhona tha avang a case ziahluh ngai a tlem zel a beisei thu tarlangin thawhhona tha zawk awm turin a sawm nghal a ni.

Pu Donny Lalruatsanga chuan kum liamtaa MJA te nena thawhhona tha tak awm chu chhunzawm zel a beisei tih tarlangin, hmalam hunah thawhhona tha zawk awm tura thawhpuihia a sawm nghal bawk a ni.

<><><>

SASCI

SASCI Sum, Cheng Vaibelchhe 12 senga National Highway No.06 Khankawn atanga - Champhai Kanan veng thleng, Champhai luhka a kawngpui zauhna tur chu a hmunah kalchilhin, Pu TBC Lalvenchhunga, Adviser to CM (Finance & Planing) chuan PWD hotute hruaiin an ennawn.

Pu TBC Lalvenchhunga chuan Kawngpui tha nei theih tawp an chhuah zel dawn a ti a, he kawngpui laihzauh hna kalmekna tura ruahmanna hmasa chu siamrem nise a ti a. He kawng laihzauh hna thawh kal mekah hmun thenkhatah harsatna a awm avangin ruahmanna thar siam a ni a, kawngpui awmsa chu zawh tluan lovin mimal ram kaltlangin pumpelh kawngpui thar siam a ni ang a, kawngpui awmsa aiin Metre 650 in a tawi zawk dawn a ni, Adviser to CM chuan a ti.

Nimina Khankawn - Kanan kawngpui laihzauh hna thawh mek enfiahnaah hian Chief Engineer Pu David Sapzova, Champhai DC Pu Mohammed Aqqip, SE MPWD, Champhai district NGO Coordination Committe hruaitute, Champhai Sub-hqrs YMA hruaitute leh Champhai North BlocK ZPM hruaituten Adviser to CM hi an tawiawm a ni.

<><><>

MAMIT JOINT ROAD INSPECTION:

National Highway 108 atanga Mamit khawpui luhna tur kawngpui siam tur chu nimin khan Mamit a tlawmngai pawl hrang hrangte, political party hruaitute leh PWD Highway Division aiawh bakah, kawng siamtu tur company hotuten an en ho.

Kawng siam dan tur entute chuan Mamit khawpui luhna tur kawngpui chu a theih anga zal leh ngil thei ang berin kal se an duh a, zangna dawmna/compensation a awm dawn loh avangin kawng zauhna tur a ram neitute chu an inah leh chilh a dil nise an ti bawk.

Mamit khawpui luhna tur kawngpui zauh tur hi kilometer 4.5 a thui niin, kawng zau zawng hi meter 8 tura ruahman a ni a. Alkatra luan chin tur pawh meter 5.5 a zau a ruahman a ni a, SASCI sum cheng vaibelchhe 9.89 hmanga siam tur a ni a, kawng siam hna hi Sumati Creative Infrastructure pvt ltd ten an thawk dawn a, kum 2 chhunga zawh hman tur a ruahman a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

ESTHER HNAME

Ramchunga naupang chawimawina Pradan Mantri Bal Shakti Puruskar Award dawngtu Esther Hnamte chu nizan khan Reliance Company neitu leh Asia rama pa hausa ber ti a hriat Pu Mukesh Ambani Inah a zai. Pu Mukesh Ambani hian India Cricket Team mipa leh hmeichhia ten hlawhtlinna duhawm tak an neih a lawmpuina pual a hun a buatsaihah hian Bollywood film star lar tak an tl a, heng zingah hian Mizo naupang Esther Hnamte chuan Teri Mitti tih Hindi hlag chu a sa a ni. Esther Hnamte hi a nu leh a putea ten an hruai a, ruahman dan chuan vawiin lam hian Mizoram an rawn pan ang.

A kawr hak tur hi Pu Mukesh Ambani te chhungkua in an ruahman sak a ni a, Fungki ten Mizo puantahna atanga an kutchhuak a ni a, a kawrah hian hmasang atanga Mizo te ngainat pangpar a chuang a, puan pawl an hmang a ni.

<><><>

EXCISE

Mamit Excise & Narcotics Department chhinchhiah danin Mamit District huamchhungah nikum 2025 chhung khan Ruihhlo thubuai 323 ziahluh niin, ruihhlo kaihhnawihah mi 221 man an ni.

Nimina Mamit Excise & Narcotics department te'n kumin 2026 pisa kal tan ni a Pathian hnena inhlanna leh nikum chhunga an hmalakna tarlanna hun an neih ah he thu hi tichhuakin, kum kalta 2025 chhung khan Rakzu litre 2048.375, zubilh lai Tin 4926, Heroin gram 49.8, Ganza gram 3024, zu thlawrna bel 107 leh ruihtheih thil kawihhnawih lirthei 7 an man bawk a, he huna thusawitu Mamit Excise & Narcotics Department Asst Commissioner Pu Lalsangzuala Ralte chuan Mamit District chhunga tlawmngai pawlte leh Kohhran hrang hrang te nen thawhona tha tak an neih avangin lawmthu a sawi a, Mamit District khaw hrang hrangah Drugs Awareness Campaign an neih thin thu leh Tripura State chhunga Zampui tlangdungah pawh Drugs Awareness Campaign an neih tawh bakah Drugs awareness kaltlang hian ruihhlo la ti lo thalai/tleirawl mi 416 te hnenah ruihhlo ti lo tura intiamna an neih pui thu a sawi bawk.

Mamit Excise & Narcotics department te chuan nikum 2025 a ruihhlo kaihhnawih thubuai an ziahluh leh hemi kaihhnawih a mi an man tam ber te chu kum dang ang bawkin Zu kaihhnawih (MLP Act 2019) a nih thu an sawi bawk.

Khawzawl Excise & Narcotics Department chuan thla hlui December khan Zu kaihhnawihah Case 12 an ziaklut a, ND&PS Act hnuaiah Case ziahluh an nei lo thung.

END Khawzawl hian thla hlui khan MLP Act hnuaiah Case 12 ziaklutin a kaihhnawihah mi 11 an man a. Rakzu 19 Litre, BEDC 26.4 Litres bakah Beer Can 2 an man a ni.

END Khawzawl hian nikum chhung khan ND&PS Act hnuaiah Case 7 ziaklutin mi 8 an man a, MLP Act hnuaiah Case 180 ziaklutin mi 146 an man bawk. Hemi hun chhung vek hian Heroin 540 grams, Ganja 3.55 grams, Rakzu Litre 248.1, BEDC 206.55 litres, Beer 122 Cans, Sapzu um 4, Zu bilh lai 109, Yeast 300 grams bakah zu bilhna hmanrua Bel 27 leh Barrel 4 an man a ni.

RD Darthanzauva, PTC Mamit/ Lalsangpuii Khawzawl PTC.

<><><>

GRAM G

Union Agriculture and Farmers' Welfare, and Rural Development Minister Shivraj Singh Chouhan chuan Viksit Bharat-G Ram G Act chu thingtlang kuate intodelhna tura kawng pawimawh tak a ni a ti. Tamil Nadu-a Erode hmuna kut hnathawktute hmaah he thu hi sawiin Pu Chouhan ahmaa dan hman MNREGA khan ni 100 inhlawhna a pek a, mahse hmun tam tak ah chuan hna thawh tur a tam tawk lo a, hmun thenkhatah hlawh pek that a ni lo bawk a ti a. Hei hi thil tha lo tak anih thu sawiin sawrkar chuan a siamthatna turin Viksit Bharat-G Ram G Act a siam ta tih sawiin dan hmasaa tha lo lai leh hlemhletna inrawlh thin te paih bo vek a ni ta a ti bawk. Union Minister chuan dan thar hnuaiyah hian ni 100 inhlawhna awm thin chu ni 125 ah tihpun anih thu a sawi bawk a ni.

<><><>

AMIT SHAH

Union Home Affairs and Cooperation Minister Amit Shah-a chuan vawiinah CSR Conclave New Delhi-a Vigyan Bhawan-ah a hawng dawn. He conclave ah hian thupuiyah Role of Corporate Social Responsibility in Nutrition Security and Malnutrition Mitigation tih a ni a. Naupang chaw tha khamkhawp hmu lo te hnena chaw tha pek na kawngah thawhona tha leh tih dan thar tha zawkte sawiho a ni ang. Conclave hi National Dairy Development Board, NDDB te buatsaih a ni a. Union Minister Amit Shah-a hian Shishu Sanjeevani Programme a tlangzarh dawn bawk a ni.,

<><><>